

Tujetsch e sia scola

La Val Tujetsch ei ina republica per sesezza. Ella meina in'atgna veta ha atgnas disas agens usits ed ei conservativa per tschien procent en tuts graus. A quella mentalitad engraziein nus per ina part la ventira; da haver ussa ella biala val tujetschina duas stupentas ed exemplaricas casas novas da scola. Per ina part ditgel; l'otra part da quella ventira numnada consista ella voluntad dil tuttafatg caracteristica dall'entira populaziun da dar a sia giuventetgna ina cumpleina seriusa e per tgierp ed olma favoreivla educaziun attaschada alla pli aulta finamira humana: Niessegner e sia beada perpetnadad. En questa ludeivla intenziun ein tuts Tujetschins e tuttas Tujetschinas units e conforms; la maniera denton e la via per contonscher questa finamira dattan savens biaras caschuns a caudas ed intensivass discussiuns.

Scolas existevan gia daditg en Tujetsch. Pader Placidus a Spescha il renomau capitular dalla claustra da Mustér il spiritual viagiont - denter auter eis el staus treis onns (1809-1812) beneficiat a Selva ed ulteriurs treis onns (1812 -1815) caplon da Sedrun - ha fatg interessantas remarckas sur las scolas da Tujetsch da gliez temps. Menar la scola ei stau tenor pader Placidus a Spescha caussa dils aultreveri signurs caplons. Igl autur numna questa obligaziun expressivamein in fastedi (eine Beschwerde) che seigi vegnius adossaus al caplon da Sedrun. Secapescha sch'ins seregorda dils gronds interess alpinists geografics e mineralogics che han clamau e quasi surmenau il bien pader caplon da prender siu fest cun bintgun e dad ir en sias muntognas fetg carezadas! La scola fuva per siu grond spért e da vast horizont propi ina cadeina e la stretgadad dalla stiva da scola sco ina perschun. Denton ha pader Placi a Spescha stuiu dar scola mo duront ils meins d'unviern, numnadamein dall' entschatta da november entochen la dumengia da palmas. Skis enconuscheva ins da gliez temps buc ed il sport d'unviern fuva la lavur dil pur muntognard ensemen cul cumbat encunter las sgarschurs cunzun dallas lavinas tujetschinas. Ils scolars ein vegni instrui oravontut el leger e scriver en romontsch e latin. Tgi sa sche la carezia per il lungatg latin e siu diever els survetschs divins entras igl entir pievel derivan aunc da lezza perioda da scola?

Tenor idea da pader Placi havess ins stuiu schar dar scola laics e buca spirituals e quei havessen umens stuiu menar las scolas pils buobs e „dunschalas veglias e cultivadas“ quellas dallas buobas.

En in punct ha pader Placi denton giu cumpleinamein dretg sch'el di che „la vera sventira vegni mo dall'ignoranza distracziun e malignadad“ e sch'ins vegli impedir disgrazias dueigi ins educar ed instruir bein la guvientetgna.

Quels e tals patratgs e ponderaziuns ein daventai muossavias pigl entir pievel tuatschin tras decennis e tschentaners. Adina ei la scola stada in grond problem e caussa da biars quitaus. Aunc oz! Denton eis ei buca stau lev, da menar en bunas e sufficientas scolas per ina vischnaunca aschi gronda e vasta. Duront ils temps da pader Placi han ins giu scolas a Sedrun a Rueras ed a Selva. En tuts treis loghens han ils augsegners menau ellas quei senza casa da scola senza hallas da gimnastica e tuttas installaziuns modernas ed excellentas dallas qualas ins po far diever ozildi! La stiva dil rev. sur caplon da Sedrun da Rueras e da Selva fuva era mintgamai stiva da scola. Sch'ins considerescha la grondezia da lezzas stivas san ins senz'auter che Tujetsch ha da gliez temps buca giu biars scolars. Mo la vischnaunca ei carschida, las famiglias ein semmultiplicadas ed ualti spert ein las pietusas stivas dils augsegners buca pli stadas sufficientas per dar scola. La vischnaunca ei vegnida sfurzada da baghegiar. Igl emprem ha naturalmein Sedrun survegniu ina atgna casa da scola leu visavi il Sontget. Suenter han era Rueras e Selva survegniu atgnas casas da scola a Selva eis ella vegnida eregida a Sutcrestas quasi el miez dils dus vitgs Selva e Tschamut. Ni ils da Selva ni ils da Tschamut han vuliu visitar ina scola en in auter vitg e perquei han ins stuiu tschentar la casa exact el miez denter omisdus vitgs. Mo era Cavorgia ha survegniu ina pintga casa da scola era en miez da quels pigns vitgets! Finalmein han ins era dau scola a Camischolas en ina pintga casa cun mo ina suletta stiva e negins auters locals. Tschun casas da scola ha Tujetsch pia survegniu ruc a ruc e per las relaziuns da marcau eis ei stau d'imaginar tgei vias ch'ils scolasts ils augsegners ed ils cussegliers da scola han stuiu far per visitar questas scolas ed instruir lur affons.

Oz havein nus en Tujetsch tut autras relaziuns. La pintga casa da scola da Camischolas drova ins buca pli e quella da Selva stat vita muort munconza d'affons! Persuenter crescha il diember da scolars a Rueras e cunzun a Sedrun onn per onn aschia che nus havein pigl onn present en total 230 scolars numnadamein:

Rueras	52
Cavorgia:	12
Scola tudestga:	14

Per l'instrucziun da quels scolars eisi vegniu engaschau 7 scolasts primars, 2 secundars in scolast per talents manuals, ina scolasta da lavur ed ina scolasta da tenercasa, en total pia 12 forzas da scola. Nus lein cumpletar che la vischnaunca ha culla erecziun dalla casa nova da scola da Sedrun concludiu dad era introducir ina scola da tenercasa per las classas superiuras elementaras e per las classas secundaras sco era ina scola per talents manuals schinumada „Werkschule“ per las classas superiuras elementaras. La vischnaunca ha cheutras demussau gronda enconuschientscha e capientscha per tut quei che l'educaziun dalla giuventetgna pretenda ozildi.

En tut priu: igl ei da constatar che la vischnaunca da Tujetsch sia populaziun ed ils geniturs stattan „sin l'altezia“ ariguard lur scolars e l'instrucziun dils affons. Speranza vegn nossa giuventetgna uss ed oravontut pli tard a renconuscher quellas grondas ed immensas breigias che lur perdavons han demussau cullas casas novas da scola e cun tuttas installaziuns modernas. Las unfrendas cunzun finanzialas ein buca pintgas.

Ussa settracta ei da tener e mantener e sustener quei spért progressiv questa mentalitad da haver quitau per la glied digl avegnir e per il spért propri cristian dalla biala val tujetschina. En quest'intenziun ston tuts luvrar e tener ensemen ed oravontut ston la casa da scola e la casa paterna esser ina nunseparabla unitad per il salit e la ventira da nossa cara giuventetgna. En quei senn giavischa il sutsignau bial'aura celestiale e temporal per l'avertura e la benedicziun dalla casa nova da scola da Sedrun.

Stephan Schuler

caplon da Selva e president dil Cussegl da scola da Tujetsch.

Novs baghetgs da scola a Tujetsch

Gl'ei in mument nua che in entir triep vischnauncas sursilvanas han baghegiu ni baghegian novas casas da scola. Quei ei oz pusseivel cheutras che las concessiuns da nossas auas portan allas cassas communalas pli grondas entradas. Cun agid da quels mieds da finanziaziun ha la vischnaunca da Tujetsch era giu la pusseivladad e la curascha da baghegiar dus baghetgs da scola in a Rueras e l'auter a Sedrun.

Las empremas casas da scola a Tujetsch ein vegnidas baghegiadas a Sedrun scola veglia sin Cadruvi gl'onn 1848, scola a Rueras 1850, scola da Camischolas 1862 e Cavorgia gl'onn 1848. Per ils scolars da Selva e Tschamut havev'ins il local da scola a Sutcrestas en caplutta da Nossadunna. Quellas casas da scola existan aunc oz tuttas, a Sedrun han ins puspei ils onns 1884/85 baghegiu ina secunda casa da scola ed a Selva-Sutcrestas ei la scola vegnida baghegiada gl'onn 1919.

La casa da scola a Sedrun ha pia satisfatg als basegns da scola ed als basegns publics pli che 100 onns. 100 onns survetsch public ei ina brav'uriala e savessen quels baghetgs raquintar bein enquala episodada succedida sut lur tetgs. La carschen dalla populaziun e dil traffic dils davos onns fan che nos baghetgs da scola daventan memia pigns e nunsufficients, ton per lur suprem intent da scola sco era per auters basegns dalla publicitad. Cumissiuns da scola ed amitgs da scola fan attents la vischnaunca sin la necessitad ed il basegns dalla renovaziun da nossas casas da scola. Ins elegia ina cumissiun che duei studiar e preparar ils novs problems da scola. Quella rapporta alla vischnaunca e cun gronda discussiun concluda la vischnaunca gl'onn 1957 da gl'empem baghegiar la casa da scola a Rueras. Gl'onn 1959 gl'atun ei quei baghetg gia alla fin e sa vegnir surdaus agl intent dil scolaesser. Quella casa da scola survescha per ils affons da Rueras, ha 4 stanzas da scola, ina halla da gimnastica che survescha sco sala da teater per societads e la publicitad. Ina beinendrizzata cuschina per la scola dil tenercasa che survescha lu era per ils differents cuors da cuschinar che vegnan arranschai.

Fini ils baghetgs da scola a Rueras sedecida la vischnaunca per ils baghetgs da scola a Sedrun. Ins vegn perina da metter ils baghetgs novs sin in niev plaz dadens Sedrun encunter Camischolas demai che las scolars secundaras per tuts vischins dueien vegnir reunidas a Sedrun. Ils 6 differents projects per ils novs baghetgs da scola a Sedrun vegnan presentai alla radunonza da vischnaunca che sedecida e concluda unanimamein per il project da signur architect Carli Beer sesents a Turitg mo ei Tuatschin. Ils plans en detagl vegnan preparai successivamein e gia gl'atun 1960 savein nus entscheiver cun ils

fundaments dils novs baghetgs. Ei fa ina stupenta aura d'atun e nus vegnin vinavon cun ils fundament e miraglias pulit ed essan aschia sin primavera bein semtgai per dar vinavon las lavurs. Gia quei atun savein nus far tetg e cuvierer gl'entir baghetg e cheutras dat ei caschun da luvrar gl'entir unviern vid las lavurs internas.

Il niev tract da scola cumpeggia: 10 stanzas da scola, 2 stanzas da scola per las buobas ed ina pli gronda stanza per luvratori dils buobs. El medem plaun vein nus ina sala per exerzezi dallas societads e che survescha lu era per radunonzas da vischnaunca e radunonzas pli pintgas. Sut quella halla anflein nus la cuschina da scola cun 4 plattas electricas e tut il confort d'ina cuschina da scola.

Dasperas vein nus la casa dil pedel ch'ei endrizzata stupent e corrispunda era allas relaziuns hodiernas. Dalla vart encunter Sedrun ei la scoletta che nus vein era priu per fetg necessaria e baghegiu quella da vischnaunca. Quella survescha per tuts affons, principalmein a quels dils vischinadis da Sedrun e Camischolas. En combinaziun cun quellas casas vegn la halla da gimnastica che survescha el medem mument era sco halla da teater. Davos la halla ein las differentas duschas e tualettas. Sut la halla ein gronds magasins da reserva sut il tract da scola ein aunc las stanzas dil schurmetg civil che ins vegn ussa era obligaus da cumbinar cun in niev baghetg da scola. Il scaldament digl entir cumplex vegn fatgs cun ieli ed ei endrizzaus automatic.

Buca emblidar lein nus il plaz da scola e da gimnastica che cumpeggia in bionton mesira ed ei segiramein in grond avantatg pil grond diember d'affons da scola ed era pils divers basegns dalla vischnaunca sezza.

Gl'ei buca nosa caussa da dar in pareri dall'ovra finida. Eis ella perfetga en tuts graus? Corripunda ella allas pretensiuns momentanas ed a tut tgi che quenta la casa da scola per sia casa? Ton astgein nus dir oz che la generaziun hodierna da Tujetsch ha demussau grond interess e simpatia ton per la scola sco per la veta culturala sorprendend in grond buordi. Igl architect projectader ed empalader dalla lavur ha studiau cun tutta premura nos problems da scola ed exequiu sia lavur cun plascher ed ardiment. Tontas e tontas firmas indigenas ed jastras dagl impressari tochen al davos luvrer han buca schau muncar en lur prestaziuns.

Alla cumissiun da baghegiar a tuts collaboraturs ord il mistregn e commerci sco era a tuts vischins ed amitgs dalla scola engraziein nus per la buna cooperaziun e sustegn nus giavischein als educaturs prospereivla activiad ed als affons tut bien per igl avegnir.

Nus selegrein persesez cun vus e cugl entir pievel sur dall'ovra reussida e sperein ch'ella seigi gartegiada. Il Segner vegli benedir tuttas stentas lavurs ed unfrendas che quell'ovra ha caschunau. El encoruneschi quella ovra magistrala dall'educaziun cun sia particulara benedicziun divina. Vegli il suprem mussader ed educatur sut la protecziun dil qual nus tschentein dumengia nies edifeci e nossas scolas conceder che nosa giuventetgna, la speronza da scadina vischnaunca possi per dis ed onns ir cheu en pasch en ed ora e conquistar las habilitads spiritalas e corporalas necessarias per daventar ed esser buns cristifideivels habels era per la veta e ses cumbats.

Christian Berther
president communal

La casa nova da scola a Sedrun

Igl atun 1959 ha la vischnaunca da Tujetsch envidau en sis architects ad ina concorrenza per ina casa nova da scola per la vischnaunca da Sedrun.

Il schaner 1960 han ils derschaders e silsunter la suprastonza communal decidu da recumandar alla radunonza communal l'erecziun dil project d'architect SIA Karl Beer a Turitg.

La radunonza communal concluda ils 10 da fenadur l'erecziun cun approbar il preventiv da cuosts da 2.5 milliuns suenter ch'il project ei sin giavisch dallas autoritads cantonalas vegnius prolungius entras ina halla da gimnastica.

Igl entir cumplex dalla casa nova da scola secompona aunc ord
il baghetg per il pedel
il baghetg per la scoletta
e la halla da gimnastica.

Per l'erecziun dils numnai baghetgs steva in sulom da 5811m² a disposiziun il qual ei situaus el nord dalla via principala Sedrun-Alpsu ed el sid dalla staziun da Sedrun. Cunquei ch'il sulom ei zun pigns ei buca vegniu en damonda per la scola in baghetg cun singuls tracts da scola; ei ha giu num restrenscher

il menaschi da scola en in baghetg.

Il baghetg ei vegnius ruchegiaus dil tuttafatg al cunfin settentriunal dil sulom sinaquei che la part meridiunala resti libra pil plaz da giug. Quei ei tonpli stau necessari cunquei che stueva muort l'erecziun dalla halla da gymnastica aunc star liber il plaz special per gymnastica.

Propi il baghetg da scola ei tenius schi bass sco pusseivel sinaquei ch'el sepresenti buca sco in monster disturbond il maletg dil vitg. Sco transiziun al vitg vegl ein la casa pil pedel e la scoletta vegnidas eregidas sco baghetgs independents per cheutras buca disturbar la construcziun cumprovada dil vitg. La halla da gymnastica che duei survir il medem mument sco halla da fiasta ei aunc vegnida augmentada entras ina tribuna e siara giu en posiziun verticala viers ils suranumni baghetgs harmonicamein igl entir stabiliment.

El singul ein els baghetgs mess sut tetg:

En casa da scola:

En sut-plaunterren:

En ina vonconstrucziun la cuschina da scola cun 4 plattas da cuschinar, in local da magliar per 18 affons ed in magasin per material.

Il curtin dalla cuschina schai dalla vart encunter il vitg denter la cuschina e la casa dil pedel.

El tract liung secattan ils locals da schurmetg per 300 persunas ed in local da sanidad cun 12 letgs.

Il scaldament cun 2 preuls per scaldament central cun scaldament d'ieli cumbinau cun in stabiliment per aua caulda che lubess igl endrez per in bogn da vischnaunca per il qual ils locals ein prevedi.

Milsanavon secattan cheu la centrala electrica e la repartiziun dall'aua.

El plaunterren:

sesanfla l'entrada principala che schai sin la vart orientala a vesta dil vitg ed ina secunda entrada sin la vart occidentala.

Alla entrada principala ei projectau ina via d'access neu dalla via dalla staziun che vegn aunc exequida sinaquei ch'ils affons stoppien buca cruschar la prigulusa via principala da traffic.

Dall'entrada principala arriva ins en la gronda halla d'entrada ed en la sala da musica e cant dasperas.

La halla d'entrada sa cun la sala da cant ensemen vegnir duvrada sco aula cun 200 plazs da seser. Sin la vart occidentala schai il local per la scola manuala (Werkschule) cun in local per material.

Encunter il sid schai la gronda halla da pausa cun tetg ed avon quella il plaz da giug. Per giugs sin la prada da giug ei aunc prevediu el plaunterren garderoba e commoditads.

En **I. e II. alzada** schain mintgamai 5 stanzas da scola e mintgamai ina stanza per lavurs manualas, milsanavon mintgamai 1 stanza da scolasts en las qualas secattan la biblioteca da scola e material da scola.

Schegie che la scola ha stuiu vegnir piazzada en in tract da construcziun ein scola in;feriura scola superiura e scola secundara separadas ina da l'autra cun atgnas scalas.

Las stanzas da scola schain tuttas sin la vart meridiunala e mesiran 8.50 m sin 6.80 m.

L'entira preit posseda retschas da finiastras ch'ei schurmegiadas encunter il sulegl cun storas da rullar d'alumini.

En la **II. alzada** vegnan las salas da scola sclaridas dad omisduas varts entras la glisch dil nord.

Ins ha dau gronda breigia da porscher als locals da scola tonta glisch sco mo pusseivel. Las mobillas dils locals da scola sco mobiglias da scola scaffas tablas da preit ed autras tablas per l'instrucziun corrispundan allas pretensiuns hodernias.

Els corridors ein las garderobas vegnidas piazzadas sut ils bauns da seser ils portcalzers. Las commoditads necessarias per scolasts, buobs e buobas secattan en l'emprema alzada.

Pigl entir stabiliment da scola han ins sedau gronda breigia d'applicar material indigen.

Tuttas lavurs da scrinari egl intern dalla casa da scola ein vegnidas exequidas ord l'enn ruver e pegn indigen quei l'enn ei buca vegnius curclaus.

Tuttas finiastras cun veiders dubels ein exequidas en l'enn tieu.

Exteriuramein ein ils mirs vegni eregi ord granit indigen, ils parseuls dallas finiastras ord larisch ed ils tetgals ord pegn.

La casa da scola ei unida entras in corridor sutteran cun il sut-plaunterren dil pedel e la halla da gymnastica cun tuts ulteriurs locals aschia ch'ils scolars arrivan era sut tetg cura ch'ei neiva e plova alla halla da gymnastica. Il corridor da comunicaziun survescha il medem mument sco canal per ils stabiliments d'aua e scaldament.

Dalla casa da scola alla casa dil pedel ei vegniu eregiu in baghetg da comunicaziun che survescha sco deposit da velos e skis.

La **casa dil pedel** cuntegn el sut-plaunterren:

local da schurmetg

tschaler

pistregn

ed in luvratori

el plaunterren:

biro stiva

combra da durmir pils geniturs

combra da durmir pils affons

cuschina cun plaz da magliar

bogn e commoditad

El surcombras sa aunc vegnir drizzau en ulteriuras combras da durmir. Denter la casa e la scoletta schai igl iert pil pedel. Sper la cuschina ei il local d'arrest per la vischnaunca.

La casa dil pedel ei unida cun la scoletta. Quella communicaziun survescha sco ulteriur plaz cuvretg da pausa.

La **scoletta** posseda ina atgna entrada sin la vart orientala. Ella ha negina communicaziun cun la casa da scola aschia ch'ils affonets san buca vegnir mulestai dals affons pli gronds da scola.

Il local dalla scoletta ha ina raesira da 8.30 x 8.70 m. La preit orientala e meridiunala posseda finiastras entiras. Il plauntschiu sura ei ord lenn il plauntschiu sut ord corc. Pliras scaffas ein baghegiadas en. Garderoba avon il local e las necessarias commoditads ein avon maun. Ina terrassa per part cuvretga e per part aviarta survescha sco terrassa da giug.

Tras ina porta da veider (Windfang) e sur la terrassa contonschan ils affons lur prau da giug cun chista da sablun e requisits da giug.

La **halla da gimnastica** che duei el medem mument survir sco halla festiva contonscha ins neu dalla scola tras il corridor da communicaziun sco era directamein tras l'entrada principala sin la vart orientala.

La halla da gimnastica ha ina mesira da 12.00 x 20.50 m.

La tribuna ina tala da 16.50 x 7.00 m. Alla halla da gimnastica appartegn l'entrada principala cun garderoba per ils hospis da fiasta.

Las garderobas dils scolars cun 6 duschas, indrezis per bogns da peis ed il local pils requisits da gimnastica.

La **tribuna** che survescha per part per representaziuns da gimnastica, teatralas e.a.v. ei prevedida per illuminaziun da soffitas, indrez pil suflader ed umbrivals ch'ins sa midar ora, respect. umbrivals da decoraziun. In vast local survescha sco plaz da deposit per culissas ed auters indrezs da teater. Quei local posseda era ina extrada directamein el liber.

Sut la tribuna ed uniu cun quella secattan las garderobas pils giugadurs e giugaduras cun commoditads.

Sut l'entira halla da gimnastica ein tschalers che surveschan sco locals per requisits da pumpiers e sco locals per velos ed autos.

Avon la halla da gimnastica schai sin la vart occidentala il plaz dir da gimnastica en ina mesira da 18.00 x 36.00 m cun il foss da siglir ed igl endrez da reiver. Il plaz ei curclaus cun asphalt tgietschen.

Viers il sid siara ina prada da giug en ina mesira da 38.00 x 26.00 m giu igl entir stabiliment da scola.

Il volumen da construcziun cumpeglia per la casa da scola 9 541.- m³

per la habitaziun dil pedel	1 135.- m ³
per la scoletta	1 287.- m ³
per la halla da gimnastica	697.- m ³
Ensemen cun tuts ulteriurs locals	16 660.- m ³

Sco decoraziun artistica ei prevediu:

1 fontauna cun 1 maletg da scraffito en la halla da pausa

1 maletg sur l'entrada principala sin la vart orientala ed

1 pintga figura en la halla d'entrada.

Ad interim ei l'erecziun da quella decoraziun vegnida refretga entochen ch'il surpli da cuosts ei sclarius

giu. Sulettamein per l'escha d'entrada allas singulas stanzas da scola vegn entras la scola da sculptura a Brienz eregiu reliefs ord il mund dalla fauna e dallas plontas alpinas aschia che mintga local da scola vegn signaus entras in emblem special.

Turitg ils 12 da november 1962
Karl Beer architect

Inauguraziun dalla casa da scola Sedrun

Dumengia ils 25 da november 1962

Program:

I. Benedicziun:

1. 12.30 rimnada en baselgia

Veni creator e benedicziun dils crucifixs

2. Til alla casa da scola

3. Benedicziun dil niev edifices silla piazza avon casa da scola

II. Inauguraziun:

1. Salid e beinvegni

2. Producziun dalla societad da musica direcziun sgr. scolast Teofil Schmid:

a) Alte Freunde marsch da Ernst Lüthold

b) Waldvöglein da Mayr-Mol

3. Plaid da sgr. architect Carli Beer Turitg

4. Plaid festiv da sgr. pres. communal Berther Christian

5. Producziuns dils affons e dil chor mischedau

a) Ingraziament

b) Steilalva da Eduard Lombriser direcziun sgr. scolast Leci Jacomet

c) Vallada splenduronta da Bertogg direcziun sgr. scolast Alfons Schmet

6. Giug humoristic da Placi Deragisch

7. Cuort discuors da rev. sur Stephan Schuler president dil cussegl da scola; dal representant dalla regenza; da sgr. inspectur Leo Bundi.

8. Cantata „Himni alla scola nova“ da rev. sur Giusep Durschei cumponida e diregida da sgr. scolast Giusep Huonder.

Uniuns cooperontas: Chor da femnas direcziun A. Schmet; Chor da vallada direcziun G. Huonder; Chor d'affons direcziun L. Jacomet.

9. Producziuns dalla societad da musica

a) Schwyzer-Soldaten marsch da Ernst Lüthold

b) Gipsy-Band dixieland-foxtrot da Heino Gaze

10. Conclusiun

Repartiziun da regals als affons
Investa dalla scola nova

Himni alla scola nova da Sedrun 1962

Scola nova grond'e biala
sepresentas sc'ina diala
cheu amiez la loscha val.
Tei salida tut schenada
l'antenata bandunada
forsa cun in cert permal.

Mo ils onns van en furtina
tras la veta pelegrina

e denton semida bia.
Quei che fuva ier en moda
varga spert sco ina roda
e cun quella tut che va.

Nova veta e speronza
nescha ord la cuminonza
e sefa plaunsiu valer.
Tut il bien che cheu renescha
en carezia e flurescha
acceptein nus cun plascher!

Scola nova bein postada
el sulegl dalla vallada:
Arva pia tes portals!
Ils affons la giuventetgna
han spetgau cun passadetgna
da guder tes novs locals.

Seigies ina mumma prusa
cun carezia generusa
per tes gronds e pigns affons.
Veglia bein sur la cardientscha
e diregia cun prudientscha
tes discipels tras ils onns.

Nus tschentein tei per adina
sut la protecziun divina.
Tut en tei sei benediu!
Possien biars en casa tia
prender in bigliet sin via
per anflar albiert tier Diu!

Giusep Durschei